

significant durabilem, & fixam fortunam. Et si fuerit cum domino itinerum, erit fortuna in itineribus. Pars hæc, & pars regni, ac pars Celati, si fortunatae fuerint, erit eius fortuna manifesta. Si fuerit pars fortunæ in decima uel duodecima domo, habebit natus dominium in carceratos. Si in tertia fuerit, aspexeritq; eam dominus eius benè à bono loco, habebit bonos fratres, qui eum diligent, & ipse eos, habebuntq; communia & mutua inter se commoda ac bona, & maxime si dominus ascendentis locum illum aspexerit. Pars fortunæ infortunata si fuerit, uel in signo masculino combusta, pater morietur ante matrem. Si in foeminino signo, præmorietur mater. Quando Sol aspexerit partem hanc, & dominus partis sub radijs fuerit, natus cadet de alto. Quando dominus huius partis fuerit in malo loco, & aspexerit partem, significat nato malum, maxime si fuerit sub radijs, & in aspectu infortunarum. Pars hæc si extiterit in octaua domo, maxime iuncta domino ascendentis, natus erit ualde iracundus, & tardus in factis suis, & si eum aspexerint infortunæ, erit diffamatus in tota uita sua. Et si dominus ascendentis, & dominus huius partis, fuerint sub radijs, modica uita uiuet. Quando dominus partis fortunæ fuerit sub radijs, interficit natum secundum naturam signi in quo ceciderit pars, maxime si dominus partis fuerit combustus, uel in Cazimi. Si remotus fuerit à combustione quocunq; modo, non interficit. Si pars hæc non fuerit in ascendente, sed fuerit in sexta, uel duodecima, habebit multas occasiones, & impedimenta, substantiam suam dissipabit, uel accidet ei turpis, infirmitas, propter quam fugiet de terra sua. Pars hæc si fuerit in bono loco, in aliquo signo ex regalibus, & Sol in medio cœli, in loco altitudinis, in bono esse ab ascendente, & similiter pars regni bona & apta, & fortunæ aspexerint, natus erit Rex. Et si infortunæ aspexerint ibi, dummodo sint ibi prædictæ constellationes, non poterunt multum deprimere statum nati, nihilominus depriment eum à statu Regio, habebit tamen dominium. Quicumq; habuerit Solem, aut partem regni, uel partem fortunæ, aut dominos triplicitatis Solis in diurna genitura, uel Lunæ in nocturna, in medio cœli, natus perueniet ad regnum &c. Pars fortunæ si fuerit cum Marte in tertia, uel nona domo, natus erit crudelis, sine pietate. Hæc eadem pars in decima, uel eius dominus, absq; aspectu infortunarum, facit fortunatum in suis operibus. Si hæc pars in duodecima fuerit infortunata, longam miseriam, & damnum significat, & erit hoc de natura infortunæ damnantis partem. Si fuerit in duodecima, & in eius quadrato, uel opposito aliqua infortuna, natus erit debilis corporis, & plus in sua infantia &c.

Si fuerit pars fortunæ in exaltatione Saturni, natus erit fortunatus apud senes & seruos, In exaltatione Iouis, apud potentes, & nobiles, & Theologos, ac Prælatos Ecclesiæ. In exaltatione Martis, apud equites, milites, & qui in armis se exercent. In exaltatione Solis, apud reges, & magnos principes, In exaltatione Veneris, apud mulieres principum, & nobilium, In exaltatione Mercurij, apud doctores, cancellarios, publicos notarios, negociatores, & scientiarum magistrum, In exaltatione Lunæ, apud balneatores dominorum, & uirgines humilis stirpis, & communem populum. Similiter si pars hæc fuerit in domo, uel termino alicuius planetæ, fortuna nati erit apud eosdem homines, sed tamen illi ipsi homines non erunt in tam bono statu ut superiores &c.

Pars substantiæ si ceciderit in domum substantiæ, natus erit potens in lucrando substantiam, maxime si fuerit in termino Iouis. Et si fuerit in illo loco salua, & fortis, & dominus domus substantiæ infortunatus, infortunium domini domus substantiæ, non impediet eum. Si hæc pars fuerit fortunata quamuis dominus domus substantiæ sit infortunatus, non nocebit &c.

Z ij De